

STUDENTSKO VIJEĆE PRAVNOG FAKULTETA UNIVERZITETA U TUZLI
"LEGIS"

STATUT

STUDENTSKOG VIJEĆA PRAVNOG FAKULTETA UNIVERZITETA U TUZLI
"LEGIS"

Tuzla, august 2018. godine

STATUT STUDENTSKOG VIJEĆA PRAVNOG FAKULTETA UNIVERZITETA U TUZLI

Na osnovu odredaba čl. 17. Zakona o udruženjima i fondacijama, Skupština Studentskog vijeća Pravnog fakulteta Univerziteta u Tuzli – „Legis“, na sjednici održanoj dana 30.08.2018. godine donosi:

STATUT

Studentskog vijeća Pravnog fakulteta Univerziteta u Tuzli - "Legis"

I OPŠTE ODREDBE

Član 1.

(1) Studentsko vijeće Pravnog fakulteta Univerziteta u Tuzli – „Legis“ je udruženje studenata Pravnog fakulteta, a ujedno i izborno predstavničko tijelo koje štiti interes studenata, sudjeluje u radu i odlučivanju u tijelima Pravnog fakulteta i Univerziteta u Tuzli, te predstavlja studente Fakulteta u sistemu visokog obrazovanja.

Član 2.

(1) Studenti slobodno i dobrovoljno se udružuju u Studentsko vijeće Pravnog fakulteta Univerziteta u Tuzli radi ostvarivanja kulturnih, prosvjetnih, naučnih, socijalnih, humanitarnih, sportskih, profesionalnih, i drugih aktivnosti, potreba i interesa u skladu sa Zakonom.

Član 3.

(1) Ovaj Statut sadrži:

- naziv, sjedište i područje na kojem Studentsko vijeće djeluje,
- djelatnost Studentskog vijeća,
- svrhu i programske ciljeve Studentskog vijeća,
- uvjete i način učlanjenja u Studentsko vijeće i prestanak članstva, kao i pravo i dužnosti i odgovornosti članova Studentskog vijeća,
- upravne organe Studentskog vijeća, način njihovog izbora, uslove i način opoziva, trajanje Mandata, način odručivanja odgovornosti,
- način sticanja, korištenja i raspolaganja sredstvima Studentskog vijeća,
- način donošenja odluke o prestanku rada Studentskog vijeća,
- javnost rada,
- način donošenja Statuta, izmjena i dopuna novog Statuta,
- pečat i
- zastupanje i predstavljanje Studentskog vijeća.

II NAZIV I SJEDIŠTE STUDENTSKOG VIJEĆA

Član 4.

(1) Puni naziv Vijeća je: Studentsko vijeće Pravnog fakulteta Univerziteta u Tuzli - "Legis" (u dalnjem tekstu Vijeće).

Skraćeni naziv Vijeća je: SVPF UNTZ - „Legis“ Tuzla.

Član 5.

(1) Sjedište Vijeća je u Tuzli, Muhameda Hevaija-Uskufija 7, Tuzla.

Član 6.

(1) Vijeće stiče svojstvo pravnog lica danom upisa u registar. Vijeća je samostalno u ostvarivanju ciljeva i zadataka utvrđenih Statutom Vijeća, Statutom Studentskog parlamenta Univerziteta u Tuzli, a u skladu sa Ustavom i Zakonom.

Član 7.

(1) Vijeće djeluje na području koje obuhvata Univerzitet u Tuzli, odnosno područje Tuzlanskog kantona.

Član 8.

(1) Vijeće može u okviru svojih djelatnosti i programske ciljeve osnovati subjekte za privredu i drugu djelatnost u cilju pribavljanja sredstava za pokriće troškova realizacije programskih ciljeva i zadataka, pod uslovima utvrđenim Zakonom i Statutom.

III DJELATNOST VIJEĆA I PROGRAMSKI CILJEVI

Član 9.

(1) Okupljanje i evidentiranje studenata Pravnog fakulteta radi organizovanog djelovanja za praćenje i unapređivanje pravnog i socijalnog statutsa studenta:

- Zalaganje za potpuno ostvarivanje prava svih studenata Pravnog fakulteta u okviru nastavnog, naučnoistraživačkog, socijalnog i društvenog procesa na Univerzitetu.

STATUT STUDENTSKOG VIJEĆA PRAVNOG FAKULTETA UNIVERZITETA U TUZLI

- Afirmacija svih pozitivnih, kulturnih, naučnih, intelektualnih, vjerskih i civilizacijskih vrijednosti bosanskohercegovačkog društva u svjetlu multietičnosti i liberalno-demokratskog okuženja pluralnog društva.
- Uključivanje studenata Vijeća u evropske i svjetske tokove rada studenata i studentskih Vijeća/Udruženja, kao i uključivanje u tokove društvenog života u BiH.
- Zalaganje za slobodu naučnog, nastavnog i obrazovnog procesa na Univerzitetu i otvorenost ove institucije prema društvu.
- Zalaganje za učešće studenata u procesu kreiranja i realiziranja programa rada Fakulteta, Univerziteta i participiranje studenata u organima i tijelima visokoškolskih institucija Univerziteta i univerzitetskih asocijacija entiteta u BiH.
- Permanentne aktivnosti na ostvarivanju optimalnih uvjeta socijalnog, zdravstvenog i materijalnog obezbjeđenja studenata, kao i stvaranja uvjeta za uključivanje svršenih studenata u rad, odmah po završetku studija.
- Zalaganje za uspostavom integracije i suradnje sa sličnim vijećima/udruženjima iz bližeg okruženja, susjednih zemalja, Evrope i svijeta.
- Zalaganje za uvođenje progresivnih mjera u radu sa visokoškolskim institucijama, za osuvremenjivanje nastavnog procesa i praćenje suvremenih trendova u nastavi.
- Organiziranje tribina, javnih rasprava, seminara, kulturnih, sportskih manifestacija kao i pokretanje drugih manifestacija javnog karaktera, koje mogu biti organizovane u domenu interesa Vijeća.

Organizovanje i drugih poslova u skladu sa planom i programom rada Vijeća.

Član 10.

(1) Radi ostvarivanja programskih ciljeva, Vijeće preduzima mjere i akcije, zauzima stavove i s njima upoznaje nadležne organe, daje inicijativu za izmjene zakona i drugih propisa i daje svoje mišljenje u postupku za njihovo donešenje, preko svojih predstavnika sudjeluje u radu komisija, savjeta i drugih tijela kada se raspravlja iz oblasti pravnog i socijalnog statusa i drugih prava studenata Univerziteta.

IV ČLANSTVO

Član 11.

(1) Svi redovni studenti I, II i III ciklusa studija Pravnog fakulteta Univerziteta u Tuzli mogu biti članovi Vijeća.

Član 12.

(1) Redovnim studentom se postaje upisom na Pravni fakultet Univerziteta u Tuzli kao redovan student.

Član 13.

(1) Vijeće može imati i vanjske saradnike. Vanjski saradnici ne ostvaruju članstvo unutar Vijeća i ne učestvuju u njegovom direktnom radu.

Član 14.

(1) Vanjski saradnik Vijeća može biti svaki građanin Bosne i Hercegovine, kao i svako drugo lice koje pomaže rad Vijeća i ostvarivanje njegovih ciljeva i zadataka onda kada Vijeće od njega to zatraži.

Član 15.

(1) Prava članova Vijeća su:

- da biraju i da budu birani u organe i tijela Vijeća,
- da sudjeluju u radu i aktivnostima Vijeća,
- da uživaju sva prava i zaštitu Vijeća, pod uvjetima iz ovog Statuta.

Član 16.

(1) Dužnosti članova Vijeća su:

- da čuvaju ugled Vijeća,
- da provode odluke i zaključke organa Vijeća,
- da provode odluke i zaključke organa Studentskog parlamenta,
- da savjesno i odgovorno izvršavaju povjerene poslove i zadatke u vezi sa radom i aktivnostima Vijeća,
- da propagiraju djelatnost Vijeća, a posebno značaj njenih programskih ciljeva,
- da izvršavaju i druge obaveze koje im budu stavljene u zadatak.

Član 17.

(1) Članstvo u Vijeća prestaje istupanjem iz Vijeća i isključenjem člana Vijeća. Istupanjem člana iz Vijeća prestaje članstvo u Vijeću, podnošenjem pismene izjave da ne želi biti član Vijeća.

STATUT STUDENTSKOG VIJEĆA PRAVNOG FAKULTETA UNIVERZITETA U TUZLI

(2) Status člana Vijeća prestaje takođe završetkom studija.

(3) Član Vijeća može se isključiti iz Vijeća na temelju pismeno obrazloženog zaključka Upravnog odbora Vijeća zbog ponašanja kojim se nanosi šteta Vijeću, narušavanja ugleda organa, tijela ili člana Vijeća, neopravdanog neizvršenja zadataka i obaveza od interesa za rad Vijeća, kao i neaktivnosti u periodu od najviše tri mjeseca.

(4) Odluku o isključenju člana iz Vijeća donosi Skupština Vijeća.

(5) U okviru Studentskog vijeća nije dozvoljeno političko, vjersko i stranačko organizovanje i djelovanje u okviru rada, sjednica, projekata i sl.

V ORGANI VIJEĆA

Član 18.

(1) Organi Vijeća su:

1. Skupština Vijeća,
2. Upravni odbor Vijeća,
3. Predsjednik Vijeća i
4. Nadzorni odbor.

1. Skupština

Član 19.

(1) Najviši organ Vijeća je Skupština Vijeća.

Skupštinu udruženja čine legalno izabrani predstavnici sve četiri godine I ciklusa studija, i po jedan student predstavnik sa drugog i trećeg ciklusa studija.

U Skupštinu Vijeća bira se po devet studenata sa svake godine studija, i po jedan student sa drugog i trećeg ciklusa studija.

(2) Djelovanje organa Vijeća odvija se kolektivno u okviru ovlaštenja utvrđenih ovim statutom.

Član 20.

(1) Mandat zastupnika traje jednu godinu. Izbor i opoziv zastupnika vrši se po postupku i u skladu sa normativnim aktima Vijeća.

Član 21.

(1) Skupština Vijeća može se zakazati kao redovna i vanredna. Redovna sjednica Skupštine Vijeća održava se najmanje dva puta godišnje, a istu saziva predsjedavajući Skupštine Vijeća, po zakazanoj potrebi saziva Upravni odbor Vijeća na vlastitu inicijativu, odnosno na zahtjev najmanje jedne trećine zastupnika u Skupštini Vijeća.

Član 22.

(1) Sjednica Skupštine Vijeća mora se najaviti najmanje sedam dana prije predviđenog za održavanje sjednice, sa naznakom vremena, mjesta održavanja i dnevnog reda. U izuzetnim slučajevima zakazivanje sjednice Skupštine Vijeća može se najaviti i u kraćem roku, ali ne kraćem od tri dana prije dana predviđenog za održanje sjednice.

(2) Skupština Vijeća punovažno odlučuje i donosi odluke ako je sjednici prisutno više od jedne polovine zastupnika.

(3) Odluke donosi u pravilu konsenzusom, odnosno većinom glasova ukupnog broja sjednici prisutnih zastupnika.

(4) Rad je javan, osim u izuzetnim slučajevima gdje se poslije održane skupštine daje saopštenje za javnost.

Član 23.

(1) Skupština Vijeća:

- donosi Statut Vijeća i odlučuje o njegovim izmjenama i dopunama,
- donosi poslovnik o svom radu i o radu organa i radnih tijela Vijeća,
- bira i razrješava Upravni odbor Vijeća, Predsjednika i podpredsjednika Vijeća, sekretara, nadzorni odbor i studentske predstavnike u Naučno nastavničkom vijeću fakulteta,
- imenuje radna tijela Vijeća(komisije, savjete, radne grupe i druga),
- donosi smjernice za rad Vijeća,
- donosi Program rada Vijeća,
- donosi finansijski plan i završni račun Vijeća,
- odlučuje svake godine o načinu finansiranja Vijeća,
- raspravlja i odlučuje o svim pitanjima koja se tiču realizacije programskih ciljeva i djelatnosti Vijeća,
- razmatra izvještaj o radu Upravnog odbora Vijeća i o istom daje ocjenu,
- razmatra i usvaja izvještaj o radu i finansijskom poslovanju Vijeća,
- odlučuje o prestanku postojanja Vijeća,
- odlučuje o dodjeljivanju priznanja i nagrada,
- odlučuje o žalbi člana Vijeća,
- donosi i druge odluke i zaključke iz svoje nadležnosti,
- odlučuje i o drugim pitanjima u skladu sa Zakonom i ovim Statutom.

Član 24.

(1) Skupština Vijeća iz redova predstavnika svih godina bira sve članove organa Vijeća, odnosno: predsjednika Vijeća, zamjenika predsjednika Vijeća, sekretara, predsjedavajućeg Skupštine Vijeća, nadzorni odbor, studentske predstavnike u Naučno nastavničkom vijeću fakulteta, delegate za Skupštinu Studentskog parlamenta Univerziteta u Tuzli, kao i članove Upravnog odbora na mandat od 1 (jedne) godine.

(2) Predsjednik Vijeća je član Upravnog odbora. Pri odsustvu Predsjednika mijenja ga zamjenik predsjednika Vijeća u svim njegovim obavezama i nadležnostima. U slučaju da Predsjednik iz nekog razloga prestane vršiti dužnost predsjednika Vijeća, vršilac dužnosti predsjednika Vijeća postaje Zamjenik predsjednika.

(3) Predsjednik Vijeća mora da ispunjava najmanje sljedeće uslove:

1. Predsjednik vijeća ne može biti predsjednik drugog Udruženja građana, po horizontalnoj osnovi.
2. Predsjednik Vijeća izričito je redovan student Pravnog fakulteta Univerziteta u Tuzli.
3. Predsjednik Vijeća prije biranja na tu funkciju treba imati određeno iskustvo, odnosno morao je već ranije biti uključen u rad Vijeća, u smislu rukovođenja ili članstva u organima i sekcijama Vijeća, ili članstva u naučno-nastavnom vijeću Pravnog fakulteta Univerziteta u Tuzli.

Član 25.

(1) Predsjedavajući Skupštine saziva Skupštinu Vijeća i rukovodi njenim radom, potpisuje akta koja donosi Skupština, prati realizaciju zaključaka i obavlja i druge poslove u skladu sa ovim Statutom.

Član 26.

(1) Organizacija, način rada i odlučivanja na sjednici Skupštine Vijeća bliže će odrediti Poslovnikom o radu organa Vijeća.

Član 27.

(1) Tokom trajanja mandata članovima Skupštine Vijeća nije dozvoljeno političko i stranačko organizovanje, propagiranje i djelovanje političkih stranaka, niti održavanje skupova ili drugih vidova djelovanja koja u osnovi imaju političke ciljeve. Kršenjem ovog člana student gubi sve funkcije u Vijeću i mogućnost predstavljanja studenata.

2. Upravni odbor

Član 28.

(1) Upravni odbor je izvršni organ Skupštine Vijeća kojeg bira Skupština iz svojih redova.

Upravni odbor sačinjavaju predsjednik Vijeća i 13 članova koje bira skupština Vijeća i to:

- po tri studenta sa svake godine studija,
- student predstavnik II ciklusa studija,
- sa mandatom od 1 (jedne) godine.

Upravni odbor za svoj rad odgovara Skupštini.

Član 29.

- (1) Upravni odbor stara se o izvršavanju odluka Skupštine Vijeća, a naročito za sljedeće poslove:
- utvrđuje prijedlog programa finansiranja redovne djelatnosti i proširenja materijalne osnove Vijeća i dostavlja ga Skupštini na razmatranje i usvajanje,
 - utvrđuje prijedlog finansijskog plana i završnog računa i dostavlja ih Skupštini na razmatranje i usvajanje,
 - utvrđuje prijedlog izmjena i dopuna Statuta i drugih opštih akata Vijeća,
 - utvrđuje prijedlog izvještaja o radu Vijeća,
 - utvrđuje prijedlog godišnjeg i dugoročnog programa rada Vijeća,
 - Priprema informacije, analize i druge materijale neophodne za rad Skupštine Vijeća,
 - stara se o pravilnom vršenju stručnih, finansijskih i administrativno-tehničkih poslova Vijeća,
 - stara se o blagovremenom izvršavanju odluka Skupštine,
 - forimira radna tijela(komisije i radne grupe) radi proučavanja pojedinih pitanja od interesa Vijeća,
 - po potrebi vrši izbor rukovodioca sektora Vijeća,
 - vrši izbor administrativno-tehničkih radnika u stručnoj službi Vijeća,
 - izvršava finansijski plan, donosi prijedlog njegovog rebalansa i prijedlog završnog računa,
 - stara se za blagovremeno proticanje sredstava za rad Vijeća,
 - donosi Pravilnik o svom radu,
 - donosi odluku o imenovanju rukovodilaca organizacionih jedinica Vijeća,
 - imenuje vanjske saradnike Vijeća,
 - imenuje predsjednika Upravnog odbora,
 - vrši i druge poslove utvrđene ovim Statutom ili posebnim odlukama Skupštine Vijeća.

Član 30.

- (1) Upravni odbor radi u sjednicama, na kojima se punovažne odluke donose u prisustvu više od jedne polovine članova. Upravni odbor se sastaje po potrebi, a najmanje jednom u mjesecu. Odluke se donose natpolovičnom većinom glasova prisutnih.

Član 31.

- (1) Sjednicama Upravnog odbora rukovodi Predsjednik Vijeća. Zapisnik vodi Sekretar Vijeća.

Član 32.

- (1) Članovi Upravnog odbora će na prvoj sjednici odabrati Predsjednika Upravnog odbora u skladu sa članom 30., stav 1. ovog Statuta.

(2) Predsjednik Upravnog odbora obavlja sljedeće poslove:

- 1) Na inicijativu predsjednika Vijeća saziva sjednice Upravnog odbora ili to čini samoinicijativno kada smatra da je potrebno,
- 2) Prati realizaciju zadataka i obaveza članova Vijeća i rukovodilaca sektora vijeća, te o tome podnosi izvještaj Predsjedniku Vijeća,
- 3) Utvrđuje postojanje povreda Statuta od strane članova Vijeća te iste prijavljuje Predsjedniku Vijeća,
- 4) Mjenja Predsjednika Vijeća kada on nije u mogućnosti da rukovodi sjednicom Upravnog odbora,
- 5) Zajedno sa Predsjednikom Vijeća potpisuje akte koji se dostavljaju Skupštini Vijeća,
- 6) Obavlja ostale poslove za koje ga imenuje Predsjednik Vijeća.

Član 33.

(1) Način rada, donošenje odluka i rješavanje drugih pitanja iz djelokruga rada Upravnog odbora utvrđuju se Poslovnikom o radu Upravnog odbora.

3. Predsjednik Vijeća

Član 34.

(1) Predstavljanje i zastupanje Vijeća povjereni je Predsjedniku Vijeća. Predsjednik Vijeća sklapa sporazume i ugovore u cilju ostvarivanja obaveza Vijeća, te oblikuje i nadzire medijski identitet i promovisanje Vijeća.

(2) Predsjednik Vijeća može sazvati vanrednu sjednicu Skupštine Vijeća u slučaju kada to on ocijeni da je potrebno. Predsjednik Vijeća daje privremenu saglasnost na Poslovnik o radu Skupštine Vijeća.

Član 35.

(1) Predsjednik Vijeća je u pravilu i student prodekan te organizacione jedinice. Ukoliko Predsjednik Vijeća ne želi biti na toj funkciji, skupština Vijeća, na prijedlog Predsjednika, bira drugo lice iz organa studentskog vijeća. Student prodekan je član Vijeća studenata prodekana Univerziteta.

(2) Student prodekan:

- a) prima prigovore studenata koji se odnose na njihova prava i raspravlja o njima s nadležnim organima organizacione jedinice;
- b) savjetuje studente o načinu ostvarivanja njihovih prava;
- c) može sudjelovati u disciplinskim postupcima protiv studenata radi zaštite njihovih prava;
- d) stara se za studentski standard i kvalitet nastave;

e) obavlja druge poslove utvrđene opštim aktiva.

4. Nadzorni odbor

Član 36.

(1) Nadzorni odbor je nadzorni organ koji nadzire rad Upravnog odbora. Nadzorni odbor se sastoji od tri člana. Članovi Nadzornog odbora ne mogu istovremeno obavljati neku drugu funkciju u Vijeću.

(2) Izbor članova vrši Skupština Vijeća iz reda svojih članova. Sjednice Nadzornog odbora će se održavati barem jednom mjesечно. U slučaju da primijete nezakoniti rad protivan ovom Statutu od strane Upravnog odbora, dužni su podnijeti izvještaj Predsjedniku Vijeća i Predsjedavajućem Skupštine koji nakon toga u roku od tri sedmice od dana primanja izvještaja moraju sazvati Vanrednu sjednicu Skupštine Vijeća.

(3) Mandat članova Nadzornog odbora traje jednu godinu sa pravom reizbora.

VI SEKRETAR VIJEĆA

Član 37.

(1) Sekretar Vijeća vodi zapisnik, održava arhivu, priprema dopise i papirologiju, obavlja poslove i zadatke u skladu sa stavovima i zaključcima Upravnog odbora, priprema sjednice u dogovoru sa predsjednikom Vijeća i brine se o realizaciji odluka i zaključaka organa i tijela Vijeća, odgovoran je za zakonitost rada Vijeća.

(2) Sekretar Vijeća za svoj rad odgovara predsjedniku Vijeća i Upravnom odboru, i o svome radu podnosi izvještaj Upravnom odboru.

Član 38.

(1) Sekretara Vijeća imenuje Skupština. Sekretar nije član Upravnog odbora, ali prisustvuje svim sjednicama istog, bez prava glasa.

VII NAUČNO NASTAVNIČKO VIJEĆE

Član 39.

(1) Za predstavnike studenata u Naučno nastavničkom vijeću Pravnog fakulteta Univerziteta u Tuzli biraju se četiri člana Vijeća i to po principu brojnosti na ciklusima studija:

- dva studenta sa I ciklusa studija,
- po jedan student sa II i III ciklusa studija.

Predstavnike studenata u Naučno nastavničkom vijeću bira Skupština.

Izabrani predstavnici su dužni sprovoditi odluke i smjernice Skupštine i Upravnog odbora Vijeća po pitanjima koja se delegiraju na Naučno nastavničko vijeće fakulteta ispred studenata. Oni za svoj rad podnose izvještaj Upravnom odboru. Mogu prisustvovati sastancima Upravnog odbora, ali bez prava glasa.

(2) Neiznošenje ili postupanje u suprotnosti sa odlukama Upravnog odbora na sjednici Naučno nastavničkog vijeća smatrati će se težom povredom Statuta.

VIII IZBORI U VIJEĆU

Član 40.

(1) Izbori za članove organa i tijela Vijeća vrše se svake godine i po pravilu su javni, ako izborno tijelo ne odluči drugačije. Bliže odredbe o izborima u Vijeću reguliše Studentski parlament kroz pravilnik o izborima.

IX IZVORI FINANSIRANJA VIJEĆA

Član 41.

(1) Za obavljanje djelatnosti i ostvarivanja programskih ciljeva i zadataka, Vijeće će sredstva obezbjeđivati iz Sljedećih izvora:

- prihoda od članarine,
- priloga i poklona,
- prihoda od vršenja vlastite djelatnosti,
- i drugih izvora u skladu sa zakonom.

(2) Vijeće vodi evidenciju o finansijskom i materijalnom poslovanju, te raspolaže sredstvima iz stava 1. ovog člana u skladu sa Zakonom i posebnim aktom Vijeća.

Finansijsku dokumentaciju potpisuje Predsjednik Vijeća ili zamjenik Predsjednika Vijeća.

X JAVNOST RADA

Član 42.

(1) Rad Vijeća je javan.

Javnost rada ostvaruje se i obezbjeđuje na način utvrđen Zakonom, ovim Statutom, te Poslovnikom o radu organa i radnih tijela Vijeća.

XI NAČIN DONOŠENJA STATUTA

Član 43.

(1) Statut Vijeća donosi Skupština Vijeća na prijedlog Predsjedništva Studentskog parlamenta. Prije donošenja statuta, vrši se njegova verifikacija i usklađivanje sa statutom i pravilnikom Studentskog parlamenta, statutom Univerziteta u Tuzli, te svim drugim zakonima koji propisuju rad Vijeća u sklopu Visokoškolske ustanove.

(2) Izmjene i dopune Statuta Vijeća vrše se na način da ih, uz prethodnu saglasnost Predsjedništva Studentskog parlamenta, natpolovičnom većinom glasova donosi Skupština Vijeća, a njihovu verifikaciju i usklađivanje sa statutom Studentskog parlamenta i statutom Univerziteta u Tuzli vrši Predsjedništvo Studentskog parlamenta Univerziteta u Tuzli.

XII PEČAT

Član 44.

(1) Vijeće ima pečat i štambilj.

Pečat je okruglog oblika, prečnika 32 mm, sa tekstrom pisanim latinicom u krugu Studentsko vijeće Pravnog fakulteta Univerziteta u Tuzli, Tuzla. U sredini pečata nalazi se naziv Vijeća „Legis“. Za pečat je zadužen sekretar Vijeća.

(2) Štambilj je četvrtastog oblika dužine 50mm i širine 20mm, sa istovjetnim tekstrom kao na pečatu i prostorom za upisivanje broja i datuma službenih akata. Bliže odredbe o broju pečata i štambilja, te načinu njihovog korištenja i čuvanja utvrđiće Upravni odbor posebnom odlukom.

XIII ZASTUPANJE I PREDSTAVLJANJE

Član 45.

(1) Vijeće zastupa i predstavlja predsjednik Vijeća.

U slučaju odsustnosti predsjednika, Vijeće zastupa i predstavlja zamjenik predsjednika Vijeća.

XIV PRIJELAZNE I ZAVRŠNE ODREDBE

Član 46.

(1) Vijeće prestaje sa radom u slučajevima određenim Zakonom i kada to odluči Skupština 2/3 većinom svih članova Skupštine Vijeća.

Član 47.

(1) U slučaju prestanka rada Vijeća, imovina i sredstva Vijeća predaju se organizaciji koja preuzima vršenje zadataka Vijeća, a odluku o tome donosi Skupština Vijeća.

Član 48.

(1) Tumačenje odredaba ovog Statuta daje skupština Vijeća.

Član 49.

(1) Ovaj Statut stupa na snagu danom donošenja.

Statut Vijeća objaviće se na oglasnoj ploči Pravnog fakulteta Univerziteta u Tuzli.

U Tuzli, 30.08.2018. godine

PREDSJEDAVAJUĆI SKUPŠTINE
STUDENTSKOG
VIJEĆA PRAVNOG FAKULTETA
UNIVERZITETA U TUZLI
"Legis"

Omar Čamđić

Studentsko vijeće Pravnog fakulteta Univerziteta u Tuzli - "Legis"

M.P